



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK

Yangia anidakangma : Tir Yimyim

tiryimyim@aolima

tir yimyim

TAPAK 8

Congress-i election akokba sülen MP nung caste census agitsü: Kcharge

France Under-21 coach asütsü Thierry Henry shimogo



VOL. XX NO. 311 (ADOK 311) DIMAPUR RASEMNÜ (WEDNESDAY)

LUROI (AUGUST) 23, 2023

₹ 5.00

Manipur Governor-i assembly session ayonger

Imphal, August 22, 2023 (Agencies): Manipur Governor Anusuiya Uikey-i August 29 nü Manipur legislative assembly session alitsü ayongogo.

August 29 anepdang 11:00 ako nungi 12 buba Manipur legislative assembly indang session pezübuba alitsü.

Iba ya masüdang Chief Minister N. Biren Singh menden ser Manipur cabinet senden ka amendang August 29 nü assembly session agitsü telemtetba agia liasü.

Taoba mapang state cabinet-i Governor dang August 21 nü monsoon session alitsü atema shia liasü. Ajisüaka Governor-i ibaji magizükba ajanga Hombarnü züngsem 60 agi akümba Manipur Legislative Assembly session melitet.

Manipur nung tatemsubaba assembly session ji March 2023 nung agia liasü. May 3 nü mepetmesü madokdang ita ka jelia iba session agiadoker liasü.

Manipur nung kin o kin tsüngda mepetmesü adoker arudang lendenlen aliba CSOs aikati assembly special session ka

jazüka alitsü takhangba agüja aruogo. Külen, Congress-ia Centre aser state sorkartemi Manipur tensa atema mapa shitak meinyaker anungji special session ka alitsüla ta takhangba agütsü.

Ajisüaka, Manipur nung Indigenous Tribal Leaders' Forum-ibo Kuki-Zo MLA 10 dang special session nung madentsü atema tetuyuba agütsüogo.

Manipur nung mapang shitak nung assembly session maliba ajanga constitutional tebilemtsü ka ajurua lir ta Congress-i ashir.

Manipur assembly session maliba atema Manipur nung taoba chief minister Okram Ibobi Singh-i Deobarnü BJP-i aniba state sorkar aitsüogo.

Manipur nung ita pezü jungnüa mepetmesü tulu adoker timtema arur saka BJP-i aniba state sorkari assembly session alitsü mayongba atema mepelar ta Ibobi Singh-i ashi.

“Constitution nung lateta aliba Manipur nung mapang shitak nung assembly session maliba ya constitutional crisis ka lir” ta paisa ashi.

Gol aser NSCN-IM tsüngda olemteptsü akok

Guwahati, August 22, 2023 (Agencies): August 26 nungi India sorkar ketdangsurtem aser NSCN-IM tsüngda Naga yimten tebilemtsü atema olemtep tenzüksü akok.

Ajisüaka, NSCN-IM aser India sorkari anogotem ano meshimtet lir ta osang angazükter.

August 21 nü GoI interlocutor AK Mishra aser NSCN-IM general secretary Thuingaleng Muivah na ajurutepdang telok ana tsüngda olemtep tenzüksüatsü atema lenmang lapok ta osang ajanga ashir.

NSCN-IM-i Naga wako aser temzüng balaka meshia tekong meranga noktaker saka tan olemtep tenzüksü dang iba onük

angattetepsü imlar.

NSCN-IM-i Naga wako aser temzüng balaka meshiba onük atema telok ana tsüngda tangatettep kati aruogo ta HT report ajanga ashi.

India sorkari Naga nung teresem ajak ka akümtsüba agizükogo ta taoba mapang NSCN-IM general secretary Th Muivah-i shia liasü.

“Iba Framework Agreement ya asenok senmang lir. Asenoki asentzü aser azü tenla anguba ya asenoki kümzüka ayutsüla” ta Muivah-isa ashi.

Nisung telok ka pei sasa ketdangüsü alitsüba nung wako aser temzüng ya pilatsü makok ta Muivah-isa shisem.

MGNREGA indang training session ka agi

Kohima, August 22, 2023 (DPRO): Mongulbarnü SIRD Conference Hall nung Gram Panchayat (GP) level nung Mahatma Gandhi NREGA maparen atema training session ka agiogo.

Yuktdhara amshia GIS-based planning aser monitoring indang training session ya NIRDPR NERC aser SIRD ajanga ayongzük.

Sentong nung Commissioner & Secretary, Rural Development, Neposo Theluo-i o jembidang NIRDPR aser SIRD nem tenüngsang agütsü.

Paisa GIS-based planning aser monitoring kanga tongtipang

ta ashi aser training nung adenertem dang jungjunga angazüksü ayongzük.

Iba sentong nung Commissioner & Secretary Rural Development-I “Women Livelihood Activities through DAY-NRLM in Tseminyu Subdivision, Kohima District, Nagaland” ta ser research kaket ka sayatsü. Iba kaket ya Principal ETC Phek Dr. Kedise Puchoi züluba lir.

Iba training ya Dr. A. Simhachalam aser Dr. Rokosuno Kintso nati agi aser tenati mobile GPS field data download süa asadanga aser Yuktdhara portal nung upload asüba sayu.

India ya \$5 trillion economy akümtsü: PM Modi



August 22, 2023 nü Johannesburg nung aliba Waterkloof Air Force Base nung Prime Minister Narendra Modi pelaa agizükdang agiba noksa angur.

New Delhi, August 22, 2023 (Agencies): Alima rongsenketzüng mejungi kümaka India ya rongsenketzüng kanga kara ainba linük ka lir aser kobi melii India ya 5 trillion dollar economy akümtsü ta Prime Minister Narendra Modi-i ashi.

Johannesburg, South Africa nung BRICS Business Forum Leaders' Dialogue nung pai iba osang metetdaksü.

“Taruba kümtem India ya alima asoshi terenlok engine ka asütsü, kechiba süra India-i alima wara mapang rongsenketzüng maparen nung temelenshi bener aru. Onoki mission mode nung mapa inyakba ajanga shishilembabaren kanga zübaa kümogo” ta pai ashi.

“Onoki compliance burden ajemtsüogo, red tape agi red

carpet melenogo aser GST den Insolvency and Bankruptcy Code mapa tenzükogo” ta PM Modi-i ashi.

“India sorkari nija nisungtem nem defence aser space sectors lapoktsüogo. Technology teyari ajanga India-i senotsü wadang nung tejakleni ogo. Yimtsüng nung aliba tetsürtem beneficiary tulutiba kümogo aser India nung nisung crore aika direct transfer benefit nungi tajanzük angur, iba nung \$360 billion shi amshir” ta paisa ashi.

“Iba inyakyim ajanga service delivery nung tashishitsü melii inyaker, ochimashi ajemogo aser tiyongsü nung inyakerterem mapa mali kumdaksüogo” ta PM Modi-isa shisem.

Alima nung startup ecosystem tasembuba jenjang nung India lir

aser linük nung unicorns 100 tema lir, ta paisa ashi.

PM Modi-i Mongulbarnü South Africa oa atong. Pa ya 15 buba BRICS Summit nung adentsü atema aoba lir.

Tanü Waterkloof Air Force Base nung South Africa Deputy President Paul Mashatile-i PM Modi pelaa agizük. Idangji pa nem ceremonial guard of honour agüja liasü.

2019 sülen South Africa-i tang mezüng atema in-person BRICS summit ayonga agir. BRICS nung Brazil, Russia, India, China aser South Africa linüktem dena lir.

Iba Summit nung Africa aser Middle East nungi sorkar tekolak 20 tema jaoka lir. Parnok aikati BRICS nung züngsem akümtsü atema asüngdangogo.

DGP Rupin Sharma-i Nagaland Police App sayatsü

Kohima, August 22, 2023 (TYO): Nagaland Director General of Police (DGP), Rupin Sharma-i Mongulbarnü Police Headquarters nungi Nagaland Police App sayatsüogo.

Iba app ya Zunheboto district atema lir aser iba nung modules 9 keta lir. Iba app nung village guard system, resource management, disaster response, command & control center, missing child tracker, foster care tracker, job verification, staff management, aser fake news mitigation keta lir.

Iba app ya Zunheboto Superintendent of Police Vishal lenisüba kübok yanglu aser tanü pai o jembidang “iba app ya technology tsütsü langka tajung ka yanglutetba masü saka police-i ozüng maparen akangshiba aser public kümzüka ayutsü nangzükba lir” ta ashi.

Police App ajanga ozüng amertemi mapa tekaraba inyaktetsü, osang tongteptsü aser mapang magii osang bendentetsü ta SP Vishal-i ashi.

Iba app ajanga sensotem aser police tsüngda osang tajungba tongteprateptsü aser mapang shitak nung mapa inyaktetsü, ta paisa ashi.

“Technology kija agi lendong nungi kümzüka meyutetsü saka uniform agiba nisungtem ajanga dang mapa takok ngua inyaktetsü. Police-i tenangzükba agiba aser bendanga agütsüba asoshi asenoki parnok nem tenüngsang agütsüdi. Parnoki asen temeket kümzüka ayutsü atema inyakba maparen nung asenoki parnok pusema nungittsü tenangzükba agidi” ta SP Vishal-isa ayongzük.

“Tarutsü nung iba application nung modules talila bendenloka

aotsüla. Iba app ya takok ngua amshira tanungba district tem nunga amshitsü. Iba app ajanga Nagaland nung police mapa tajungba akümtsü aser sensotemi police dak temulung tali lemtetsü imlar” ta DGP Sharma-ia ashi.

“Police ya khaki agiba ya dang masü. Nagaland police maparen tajungba kumdar saka ano teinyaktsü aika lir” ta pai ashi.

“Nagaland nung police verification maparen aika inyaktsü nungdaker, talisa sorkar mapa nungi shimokdang aser shishilembadak lapokdang police verification alitsüla” ta Rupin Sharma-isa ashi.

Iba sentong nung Solution provider – SIMAR Tech Consultants Private Limited nungi teshimtet nübotemi powerpoint presentation ka sayu aser DIG INT & CID, Dr KPA Ilyas-i anküp tepela o jembi.

Noklak nung 'Made in Noklak Woodstove' sayaogo



Noklak nung 'Made in Noklak Woodstove' sayaba sentong nung tangokba noksa angur.

Dimapur, Luroi/August 22 (TYO): Deputy Commissioner Noklak, Arikumba ajanga August 22, 2023 nü White Hall, Noklak Village nung 'Made in Noklak Woodstove' sayaja liasü, koba Thang Students' Union (TSU) ajanga ayongzüka temaba jenjangi ajungketba lir.

Sentong nung alakteta jaoker Deputy Commissioner Noklak, Arikumba-i Noklak Village nungi Tumong dang pelaba lemsatepa liasü, shibai 'Made in Noklak Woodstove' ya yanglu.

Sorochioktsü aser danga maparen balala nung amshitetsüsa Tumong-i temolungtetba tulu nung lipajen asoshi tajung 'woodstove' yangluba atema pai tenüngsang agüja liasü. DC ajanga Tumong dang pai yanglutetba oset atema tapet department nungi lenmang bushia 'patent rights' agitsü bilemang, ta ashi.

Tumong ya district asoshi tagitsü nisung ka lir, aser iba woodstove dak alia pai electric bike aser dryer machine tema

yanglua lir, ta DC Noklak ajanga ashi.

Tumong dak iba amala tekolok shisatsü aliba ajanga district ajangzüksü imlar, ta pai ashi.

Tumong ajungshidang DC Arikumba-isa tarutsü anogotem nunga kasa tejangraba alitsü ayongzüka liasü.

Pai iba sentong nung dena alirtem dang tarutsü nung district administration ajanga akokba lenmang nung yaritsü, ta ashi.

Dimapur YouthNet Office nung August 16, 2023 nü Nagaland Start-Up Green Innovation Challenge aliba nunga Tumong ya Runner-Up liasü, ta DC Noklak ajanga metetdaksü.

Kasa mapang pai kaketshirtem dang pei nukjidong tongtetsü asoshi temolungtetba tulu alitsü, bendanga agütsür meranga inyaksü ayongzüka liasü.

Woodstove yanglutetsang Tumong-i iba sentong nung jembidang sorochiokba

densema lenla balala nung iba woodstove amshitetba indang rateta ashi aser woodstove ya market nunga angur ta shisem.

Iba woodstove yangluba mapang pa den yariteper tem dang pelaba lemsatepa mapang, taoba Deputy Commissioner, Noklak, Reny Wilfred; taoba SP Noklak, Dr. Pritpal Kaur, Department of Industries & Commerce aser kija kibong temi pa indang mangdang asangsang akumba nung yaritepa asoshi pelaba lemsatepa liasü.

Iba sentong nung Functional Manager SDIC Noklak, Nyeipa Phom, Vice-President Khamniungan Tribal Council, T.L. Khaoshai, aser Vice-President Khamniungan Students' Union, Indhe Lam nung tema o tatsütsü jembia liasü.

Sentong nung menden Social & Cultural Secretary TSU, Chongkoi K. Lamniah liasü aser Shongmo B aser Tsuken S nungeria ken aten.

HSLC & HSSLC Exam 2024 form agütsütsü mapang atsülanger

Dimapur, Luroi/August 22 (TYO): Taoba mapang sangdonga aruba ama, Regular Repeaters, Centre Repeaters aser June ita agiba HSLC & HSSLC Examinations 2023 nung temsüa aliba Compartmental Candidates ajunga dang HSLC & HSSLC Examinations 2024 asoshi form agütsütsü anogo tatemang ya August 31, 2023 tashi atsülanger, ta sangdong ka ajanga ashi.

Iba sülenbo mapang matsülanger. Anungji shia aliba category küboki aiba kaketshirtem dang iba maongka agia HSLC & HSSLC Examinations 2024 agütsütsü asoshi tekeratiba nung form tem agütsütsü ayongzüker, ta ashi.

Regular Repeaters, Centre Repeaters aser temsüa aliba Compartmental Candidates temi pei indang form ya Regular kaketshir den balala agütsütsü, ta sangdong ajangasa ashi.

Kohima nung Anglo-Yimkhiung dictionary saya



Anglo-Yimkhiung dictionary sayaba noksa nung angur.

Kohima, Luroi/August 22 (TYO): Department of Art & Culture, Government of Nagaland ajanga adokba 'Anglo-Yimkhiung Dictionary' ka August 22, 2023 nü Advisor Youth Resources & Sports, S. Keoshu Yimkhiung ajanga sayatsüogo.

Iba osep (dictionary) sayaba sentong ya Bayavu Hil, Kohima nung Directorate of Art & Culture indang Conference Hall nung agia liasü.

Sentong nung Advisor S. Keoshu Yimkhiung ajanga jembidang, Department of Art & Culture, Nagaland University Language Department nung tesayurtem, aser Yimkhiung Literature Board ajanga bendanga agütsür inyaka Anglo-Yimkhiung Dictionary adokba asoshi tenüngsang agüja liasü.

Iba kakets adokba ya state nung Yimkhiung kin asoshi takok tulu lir, ta pai ashi.

Iba sentong nung Athel O' Lotha, IAS Commissioner and Secretary to the Government of Nagaland, Department of Art & Culture, aser Dr. Yanbeni, Assistant Professor at Nagaland University aser Yimkhiung Literature Board indang secretary nung tema jembia liasü.

Sentong nung Kohima nungi Yimkhiung Cultural Group ajanga 'Folk Tune' ajanga shilem agia liasü.

Anglo-Yimkhiung Dictionary sayaba sentong nung menden Teisovikuolie Therie, Assistant Director of Art & Culture liasü aser Adela Moa, Director of Art & Culture ajanga melepzüng o jembi.

Women's Rehabilitation Centre ka amenokogo



Dimapur, Luroi/August 22 (TYO): Silas Care & Welfare Society kübok Mongolbarnü Indisen Futsal Ground kübok Sensolikum nung Women's Rehabilitation Centre ka lapokogo.

Iba Rehabilitation Centre ya tetsürtem atema Nagaland nung mezüngbuba Rehabilitation Centre lir.

Tanü iba Rehabilitation Centre ya DABA associate Pastor Rev. Kika-i meshitetja liasü. Sentong nungsa pai lokti tayongzüka o jembia liasü.

Women's Rehabilitation Centre lapokba indang jembiba mapang Director Silas Centre, Arenla Amer-i, Silas care Centre ya Tsüngremer tetuyuba nung 2017 küm tenzüker aser Tsüngrem taochi agi tanü tashi anir aruba kuli agüja liasü.

Laisa, Silas care Centre kübok teburtem atema Rehabilitation Centre lapoker kanga takok ngua

inyaksangshiyonga odar, ajisüaka tetsürtem atema Rehabilitation Centre maliba atema khuret bona liasü aser iba atema sarasadema arur Tsüngrem taochi agi tanü iba centre lapoktetogo, ta ashi.

Arenla-i ashiba agi, tetsürtem atema centre ka mejeta melapoki liaka parnoki kümtem tsüngda tetsürtema aika anepalua aruogo aser parnok rongnungi aika taküm melenshia liyonga aoba indang kuli agüja liasü.

Maneni lai iba centre ya parnok atema dang masü saka ajak asoshi mission ka ta shia maneni iba centre nongita yaritsü ayongzüka liasü.

Rehabilitation Centre lapokba sentong ya Richang lenisüba nung agi aser Silas family-i ken tajung ka agi sentepa aliba lokti ayongzüka liasü. Sentong nungsa Sensolikum Village council nungi züngsem kati tayongzüka o jembia liasü.

Kasa mapang nung Silas Care & Welfare Society Administrator,

R Nuklu Longkumer den sensaksemba mapang pai, Silas Care & Welfare Society-i sentong balala yongzüka agir, ajisüaka parnoki talisa Old age day care aser rehabilitation dak rangloker inyakasngshia arudar, ta metetdaksü.

Silas Care & Welfare Society ya 2017 küm November 3 nü tenzüker. Iba Welfare Society ya rongsen bushitsüba atema masü saka mission ka lir. Parnoki tang tashi nung care & counseling, old age day care aser addiction care centre amala sentong balala tenzüker inyakyonga odar. Iba den bendenloksema parnoki outresch mission balala ayongzüka agia arudar.

Silas Care-i mapang talangka nungi yi ajemba aser temesepba mozü achiba ajanga timtem adoka teyari nungdaka aliba tetsürtema anepalua aruogo, saka parnok atema centre ka metenzüksü aliba Mongolbarnü officially iba centre lapokogo.

Lenmang yanglushiba atema PWD (NH) dang pelar: MTLT

Dimapur, Luroi/August 22 (TYO): Nüburtemi nungdakba ajiteta PWD (National Highway), Mokokchung Division ajanga Mokokchung jila telung aser temeket nung lenmang tapok atepba asoshi pelaba lemsateper, ta Mokokchung Town Lanur Telongjem (MTLT) tir Imnaonen Pongen aser tongti zülur Imkongchuba Pongen nati sangdong ka ajanga ashi.

Lenmang majungba den gari tali akumba aser tzungluruwa ajanga Mokokchung jila nung aliba nüburtem mapang talangka timtema arua liasü.

Ajisüaka MTLT Office ajanga PWD (National Highway), Mokokchung division dang asüngdangba ama

Executive Engineer, Er. Limatoshi aser department ketdangsür temi anor anogo ana tsüngta iba mapa inyaka lenmang yanglushia liasü, ta MTLT sangdong ajanga ashi.

Iba ama tasü ita mera agiba ajanga nüburtemi timtem ajurua aliba ajemdaksü aser iba ama mera agiba nüburtemi pela agizüksü tim, ta ashi.

Anungji jila indang stakeholder ka ama MTLT ajanga department dang pelaba lemsateper.

Kasa mapang MTLT ajanga district nung aliba department balala dang nüburtem nungdakba ajiteta jila renloktsü aser nüburtemi aginüba ama mera agitsü ayongzüker, ta sangdong ajangasa ashi.

Tuensang nung Two Wheeler Taxi permit agütsütsü

Dimapur, Luroi/August 22 (TYO): Nagaland Transport Department ajanga metetdaksüba ama Tuensang District nung lisopur nem employment agütsütsü nukjidong nung District Transport Office Tuensang ajanga Two Wheeler Taxi permit atema application meshir.

Iba permit asoshi application

agütsür ket nung two-wheeler amshitsü asoshi driving license shidak alitsüla aser tejangja ketdangsür nungi agütsüba Unemployment Certificate alitsüla.

Application ya District Transport Office (MV) Tuensang nung August 21 nungi September 2, 2023 tsüngta agütsütetsü, ta sangdong ka ajanga ashi.



Panjim kübok Miramar beach nung plastic amshiba anema tangazükba agütsüsü asoshi plastic osettem bendena ango ka yanglur toktsüba noksa nung angur.

Delhi Police-i G20 Summit atema Sept 8-10 tashi sodi agütsüdaktsüner

New Delhi, Luroi/August 22 (Agencies): Taruba G20 summit atema renemshiba mapang Delhi Police Special Commissioner-i, Delhi Chief Secretary dang September 8 nungi 10 tashi government holiday ama sangdongtsü atema shiti ka zülüogo.

G20 summit nung linük balala nungi lenirtem adenshitsu, koba Delhi kübok Pragati Maidan nung tawa lapokba state-of-the-art Bharat Mandapam convention centre nung September 9 aser 10 nü amentsü.

Summit amenba mapang gari senzusenpong aser tanga lenla balala nung tetsükdaktsü adokbatem nungi jenbo alitsü atema iba temepeshiba ya agütsüogo.

Summit mapang gari

senzusenpong nung kecha tetsükdaktsü madoktsütsü atema Delhi Police-i jenjang agidar. Iba senden nung US tir Joe Biden, China Premier Xi Jinping, Canada Ato Kilonser Justin Trudeau aser France tir Emmanuel Macron nung amala tongtibang lenirtemi shilem agiba angutsü.

Iba sentong atema renemshiba nung shilem ka ama Delhi traffic police-i, Pragati Maidan den sendaktepba lenmang tongtitem nung mock drill ka ayongzüka agiogo.

Traffic police personnel tem team aika küma lemsar junction balalai yok aser iba inyakyim nung shilem ka ama diversion point aser junction tem nung barricade tem tokja liasü.

Iba tongtibang sentong asoshi alima ajunga Delhi dak

ranglokba mapang, law enforcement agency tem aser local sorkar na tsungda angatettepa inyakba ajanga tongtibang shilem ka agitsü.

Police temi chemical aser biological weapon tem achaayangtsü atema parnok staff tem nem tangazükba agütsüdar aser parnok indang soft skills dak rangloker inyakdar.

Delhi Police, women commandos kübok Special Weapons and Tactics (SWAT) unit nungi "markswomen" terteku hopta pezü atema Indo-Tibetan Border Police (ITBP)-i parnok indang training centre nung specialised training agütsüogo.

Iba dak alia Delhi police-i, prangbong, injang, bulletproof jackets, aser X-ray machine amala hadir balala aliogo.

Nuh azütokshi lendong nung aija alir ka police-i puogo

New Delhi, Luroi/August 22 (Agencies): Nuh nung Haryana Police, crime branch-i taoba ita district nung tamangba yimsü lokti tentet ana mangatettep adokba nung aija alir ka puogo. Didhara yimtsung nungi Aamir, shiba police den khatepba sülen pua liasü, pa temang anepalutsü atema mozükidangi anirogo.

Aamir ket nungi country-made pistol ka aser injang pongu nguteta liasü, ta police-i ashi.

Aija alisang aser pa nem teyari agütsürtem Tauru anasa Aravalli hills nung atsüka lir ta osang tejangja ka angazükba sülen meita aoba sentong ka ayongzüka liasü, ta police-i ashi.

Aamir ya ozüing raksar ka lir aser pa apurtem mesüra osang agütsürtem nem senpet sen 25,000 agütsütsü nangzüker liasü, ta police-i ashi. Pa Delhi NCR nung ozüing raksaba mapare 100 shi nung densema liasü, koba timba showroom tulutemi rapok ia auyabatem lir. Pa Tauru nunga nisung tepsetba ken o ka nung aitsür lir.

Police-i ashiba agi, parnoki iba ken o nung aija alirtem shirnok Aravalli hills nung jenoka lir, parnok aputsü bushidar.

Police tem iba tesemi aiba mapang Aamir-i injang khaloktsü aser police temia meyiper injang khaloktsüba

mapang pa tetsung yirua liasü.

Bajrang Dal züingsem aser cow vigilantes Bittu Bajrangi aser Monu Manesar nati olen kar lemstepba ajanga iba mepetmesü ya tenzüik saka tena nem taitok agütsüogo ta social media nung olulu osang prokshiba dak sendakba nung police-i ashiba agi, Bittu Bajrangi pua lir aser ken o nung Monu Manesar shilem tang bushisüngdangdar, ta ashi. Police temi tang tashi nung mepetmesü adokba tesem nung Monu Manesar densema aliba kuli monguteti lir.

Iba ken o dak sendakba nung tang tashi nung nisung 280 puogo aser FIR 61 benoka lir.

Kasa mapang nung social media nung olulu osang prokshiba atema nisung 12 anema FIR benoka lir. Iba dak sendakba nung police-i nisung ka puogo.

Nuh Superintendent of Police-i, nüburtem dang olulu osang süoki ia magitsü mepeshia arudar. "Nhu police-i olulu osang prokshirtem anema jenjang tapet agitsü," ta pai ashi.

Iba azütokshi lendong nung home guard ana densema nisung trok süogo. July 31 nü Vishva Hindu Parishad's Braj Mandal Yatra ka nisung telok kati amakba sülen Nuh nung mepetmesü tulu adoka liasü.

Congress-i election akokba sülen MP nung caste census agitsü: Kharge



New Delhi, Luroi/August 22 (Agencies): Madhya Pradesh nung assembly election akokba sülen Congress-i state nung caste census ka agitsü, ta party tir Mallikarjun Kharge-i Mongolbarnü ashi. Paisa, temzüing ozüing melenshitsu merangba atema Centre aija liasü.

MP nung Bundelkhand kübok Sagar nung public rally ka nung o jembiba mapang pai iba olen lemsatepa liasü.

BJP- yimsü asüba state nung ya taküm küm tatemlen assembly election agitsü imlar.

"Nisung kari temzüing ozüing melenshitsu meranger. Iba ya tamakoktsü kechiyong linük nung nisung crore 140-i temzüing ozüing kümzüka ayutsü atema pusemdar," ta Kharge-i Dr BR Ambedkar belemtetshia

ashi, shiba MP kübok Mhow nung soa liasü.

Kharge-isa, BJP-i election mapang dang Scheduled Castes atema tongtibang nisung Sant Ravidas bilemtetba atema aitsüogo.

Ato Kilonser Narendra Modi-i tawa Sagar district nung sen crore 100 intoka Sant Ravidas indang memorial-cum-temple ka yanglutsü atema nungshilong azüingtsüogo.

2011 Census nung MP nung Dalits tem nütsüingyongsük crore 1.13 liasü.

"Modi-i linük taoba küm teku tashi yimsü süogo aser Chouhan-i (Chief Minister Shivraj Singh Chouhan) state küm 18 tashi yimsü südar. Parnoki election mapang dang Ravidas bilemteter," ta Kharge-i ashi.

Osang kaket nung agütsüba osang ka benoka jembiba mapang Kharge-i ashiba agi, BJP-i Delhi nung Sant Ravidas indang temple ka raksatsüogo.

Paisa, Madhya Pradesh nung sorkar kümtettsü atema maongka agütsüra Congress-i Sagar district nung Sant Ravidas tenüing nung university ka amenoktsütsü ta ashi.

Kharge-isa, Congress-i sorkar kümtetba sülen MP nung caste-based census ka ayongzüka agitsü.

Manipur nung mepetmesü tulu adoker aliba dak sendakba nung azütokshi lendong azüoktsü atema PM Modi-i kecha jenjang magiba atema Kharge-i PM aitsüogo.

Paisa, Congress lenir tejen Rahul Gandhi-i benokba dak ajemdaker agizükba Bundelkhand package tang tashi benoka inyakshangshi masüba atema BJP sorkar aitsüogo.

Union Home Minister Amit Shah-i tawa, Congress-i MP küm 53 yimsü asüba mapang kechi inyak ta asüingdangba telangzüba agüja Kharge-i, Bhilai Steel Plant, Indore nung IIM aser IIT, Bhopal nung AIIMS aser Chambal Ghati Project amala institution kar indang lemsatepa liasü.

ED-i CPI(M) MLA Moideen'er ki meita ao

New Delhi, Luroi/August 22 (Agencies): Enforcement Directorate (ED)-i Mongolbarnü taoba minister aser Communist Party of India (Marxist) mesüra CPI(M) MLA AC Moideen'er ki meitaogo. Kerala nung Karuvannur Service Co-operative Bank nung sen crore 100 ochi mashi ken o nung Moideen'er ki meitaogo, ta source-i ashi.

Kochi nungi central agency ketdangsurtemi state nung Mongolbar anepdang 7 ako nungi tenzüka Thrissur district kübok Wadakkanchery nung Moideen'er ki densema tesem kar meitaogo. ED ketdangsurtem ya paramilitary personnel temi meiner oa liasü.

Moideen ya tang Thrissur district kübok Kunnankulam constituency nungi MLA lir Pa ya CPI(M) state committee züingsem ka lir aser 2016 aser 2021 küm tsungda pai state Cabinet nung self-government, industries, sports, co-operation aser tourism portfolio tem bener liasü.

CPI(M)-i azüokba cooperative bank-i loan atema temelaba agüja tezülutepba shita maka non-member benamis nem sen lemtsüba dak sendakba nung ED-i tang ken

o bushisüngdangdar. Moideen-i meteta item loan team agütsü asü masü iba indang tang bushisüngdangdar.

Kerala police Crime Branch-i, iba ken o dak sendakba nung Thrissur district kübok police station balala nung FIR 16 benokba sülen, Prevention of Money Laundering Act (PMLA) kübok ED-i iba ken o bushisüngdangdar.

Taoba küm December ita ED-i ashiba agi, parnoki Karuvannur bank commission agent Bijoy AK indang rongsen crore 30.7 puogo. Pa indang rongsentem rongnung kiojen 20, gari ana, par kidang yua aliba sen lakh 5.48 aser pa indang bank account nung yua aliba sen crore 26.6 densema lir.

Iba bank ya Thiruvananthapuram nung Co-operative Societies Registrar-ia asadangdar. 2021 küm July ita FIR ka benokba sülen Registrar yagi parnok indang audit nung sen crore 100 tangalen amshiba nguteta liasü, ta agency yagi taoba küm ashi.

2021 küm July ita iba ochi mashi ken o ya temai atokba sülen CPI(M)-i parnok züingsem 13 anema jenjang agi aser bank tir densema nisung pezü mintoka liasü.



TIR YIMYIM

YIMOBILEM (EDITORIAL)

DIMAPUR RASEMNÜ, LUROI(AUGUST) 23, 2023

Kaketshir taküm asü tatidang tongtipangba?

- P Tiamongba Aier

Nagaland nung district pezü nung August 21 nungi tenzüker August 26 tashi conjunctivitis ta ajaba tenük wara ajanga school ajak shibangtsü tetuyuba agütsüogo. Dimapur, Chümoukedima, Niuland aser Mon district tem nung Deputy Commissioner temi tenük wara menatepba azüoktsü atema physical class magii atatsü telemtetba agi. Iba ya kaketshirtem atema dang masü saka tesayurtem aser tsüraburtem ajak tenük wara nungi jenbua alitsü atema lemtetba lir ta parnoki shiogo. District Administration temisa school ketdangsürtem dang online classes agitsü lenmang bushiteptsü atema metetdakja liasü. Dimapur Deputy Commissioner (DC)-i August 19, 2023 nü Dimapur district nung conjunctivitis kanga menatepba atema school ajak shibangtsü tetuyuba agütsüba sülen anogo ka lir All Nagaland Private Schools' Association (ANPSA) Central-i Dimapur DC dang iba tetuyuba meyipa agitsü atema mepishia metetdakja liasü. Dimapur nung aliba school tem nung tenük wara balaka adoka mali ta ANPSA-i ashi. Nagaland nung tenük wara lir saka kaketshir kar dak dang wara agi atong saka parnok kanga kara taneptsü nguogo aser külen school-i maruba kaketshir kangabo mali. School nung physical classes agiteter aser Health department-i ashiba ama wara noktangtsü atema mapa inyaker ta ANPSA-isa metetdaksü. ANPSA Central-isa school balala nung survey agidang school aika nung tenük wara aliba bushitet saka taoksatsüsabo masü. Tenük wara ajanga kaketshir ana mesüra asem shi ka dang school-i marur aser school kar nungbo tenük wara mali ta parnokisa Dimapur DC dangi shidi nung zülu. Maneni, parnokisa NBSE school ajak nung Class 12 atema mid-term exams agir aser school kar nungbo class tilatem tatidang agiba indang ashi. Iba jagi Dimapur nung school tem hopta ka meshibangtetsü, kechiyong mapang lateta aliba tsungda tatidang magitetsü aser iba ajanga syllabus tembangtsüba nung timtem adoktsü ta ANPSA Central-isa ashi. Iba shidi angudang ANPSA Central aser talisa Dimapur nung aliba school ketdangsürtemibo kaketshir ka taküm dang nungibo tatidang aser syllabus ang tongtipangba ama züngshir ta bilemogo. Dimapur dang masü saka tanungba district administration tem jagi tapi agi masü saka tensa-mapang kanga junga asadanga den pei pei district nung health ketdangsürtem den asungdangtepba sülen ang tenük wara menatepba azüoktsü atema school shibanga atatsü lemtetji agiba alitsü. India nung tawa conjunctivitis menatepba osang ya tasen masü saka hopta aika linük kübok tesem balala nung iba wara nungi jenbua alitsü tekümdangtsütem metetdakja arur. Tan adokba wara ya akhidang ama masü saka kanga tamajungba aser tia makarbo tenük apoktsü akok ta linük nung health mongintemi tekümdangtsü osang metetdaksüogo. Süra ANPSA Central aser talisa Dimapur nung school ketdangsürtemi kodaser district administration-i tuyuba meyipa agiang ta ashitsü lemtet ta ratar. Süra district administration-i ashiba mangai school lapoka aodang kaketshir kar danga tenük wara menara iba school ketdangsürtemi jagi kaketshirtemji anepalutsü asü mesüra iba tebilemstü khuretji parnoki abentsü? Shitakba agibo district administration-i ashiba matai school ketdangsürtemi pei pei school nung azungba kaketshirtem asoshi bilemja sodi agütsütsüla sernung parnoki meyiper sodi magütsünüi tetuyuba anema noktaksü merang saka tatem nungbo district administration-i ashiba ama school shibangtsüba kümogo. Taoba hopta Dimapur Chief Medical Officer (CMO)-i Dimapur nung conjunctivitis kanga putetba aser talisa school tanurtem menatepba indang tebilemstü bena district administration, school education department aser teachers' association den iba onük atema senden ka ayonga amen. Ano, Dimapur district hospital nung senior specialist katia July ita tatemlen nungi tang tashi nung nisung 700 tema dak conjunctivitis putetba osang lemsatepa liasü. Anungji item ajakji asadanga sülen ang Dimapur district administration jagi tenük wara menatepba azüoktsü atema hopta ka school shibanga atatsü lemtet agiba alitsü. Tanü asenoki tenük wara indang jembir saka yashi COVID-19 wara adokdang hopta dang masü saka küm junga school tem shibangtsüba tensa ajuruogo, süra iba mapang tua ANPSA Central aser talisa Dimapur nung school ketdangsürtemi tatidang aser syllabus atema ola kechiba madok? COVID-19 wara mapang agiba ama tu tanü-a online class agitsü lenmang lir nung koda? Anungji tan serbo sorkar mesüra district administration-i kaketshirtem asoshi tebilemstü bena lemtet agidang telok/nisung kari dang jangjongmaraa anema noktakra, tsüraburtem aser talisa kaketshirtem teloktemi tebang ai junger ta shidanger.

OLEMSABANG

KODAK LIMA ALIMA NUNG YANGERTSÜ SAKA ALIMA SHI AGIBO MAKOKTSÜ

M. Mei Pongener, DC Court, Dimapur.

Kü tepilemba ka lemsateper. Negative nung masü saka Positive nung agizükdaktzünür. Tetenzü shinga anema masü saka asenok ajak asoshi jungdi süng ta iba olem ya zülur.

Aikati ashir 1872 nung bener aruba Khristan yimsü ya asen sobaliba nung agizük nung jungla na ta jembir. Tetenzü iba yimsü arur asen sobaliba samaogo ta shinür. Au karbo adangji saka ajakbo masü. Kentenba kensübo temesünger kensü nung asenoki Ao ken kaket adoka adener, iba yongji tanü asen Naga nungger aika western pur den sako süa ken tenteter aika adoka lir. Saka tanü asungbo asenoki angateta aru nung asen sobaliba tajungtem aika Khristan yimsü-i agizüktetba tashibo shilua bener arua benshidaki, eg. Tsüngsangba, Sobaliba kensü etc.

Tanü iba putu tejakleni aorji ta sür iba den tsüngkang medema anidakteter ta sayunü dang inyakyim aika nung temolung yirutsüsa ataloker.

Tatishitsü ka, nibo Hug asüba ya agizükteter (Honestly) kechiba ni ya shinür ta süra, asenok dak iba Hug yimya maliba agi chichiba temeim asenok Naga nungger dak mali, talisa asen Aor dak.

Adianu tsungda temeim ano mejangja, tsürapur aser tanur temeim mali, talisa onü, oko, tsungda temeimbo ayamang. Iba yongji kinungtsüri oja, oba chi chiyongang, süngo jemang ta bo shiteter, saka onü, oko dangbo, hai nütsü nem, nebo nem chi mesüka agüjang, süngo züka yutsüang ta dang ashir. 'O' ana tetsungta ya ondang tulu ka keta lir.

Ashiko ajakeibo yamai bensaa mejembir, saka ajaki tajung ji benshitsüsa temeimji alitsüla.

Hindu, Muslim nunggerbo join family nung onü, oko, tenzüka shidakba temeim agi parnok bo Hug süa jeptepa meimteper, süra asenokbo koda?

Ni shinüabajibo item taginüba yongji oda Hugging dak ya temeim tashi tulu keta lir ta nibo agizükteter.

Onük dangi arudi, ni kü kinungtsü Mother's School graduation-i ao, Kinungtsü, Kinungbo tsungda tepilemba shidi zülur züngtepang Hug süa ajep. Nibo temoatsü angu saka ajak sako masüji karibo tenla kidangsa azüteper na? ta rata jembir.

Hug ya ken side nung yua adadang, ano dance (tsüngsangba) iba tsüngsangba ya lai nunga shia ali nungji (Khristan süaka) asenoki agizükteter. Saka tsüngsang nung ya Tsüngkang den lir. Tsüngkang tetenzü step or choreography. Tetenzü temang arakzudang action aiba.

Lanu asen putui ashirji jogo benjongbentsü, longsolongpen, tongtipang sendong ajak nung ken tena, mesüra ken atemloka yur choreography yia shilem agiteper, kanga junger nibo temoatsü angur, kenjiang tajung süra!!

Saka tsüngkang, choreography tetsung, tepen, temang arakzuba nung ya, tetenzü, tereprangtetsü aika keta lir.

Bar koba nung yi jema tsüngsangtepa pelateper iba nung ya shi azü jaboari keta lir. Tsüngsangeri pa, la nem sapudakja atsüa-a arutsü aser shi nung medemstü asoshi, tejemi (telangjok) tesümangtsüka arakzua tejemi shi ajak jetzüka tsüksüsa arakzua tsüngsanger.

Tanabuba nung Muslim nunggerbo yimsü nungbo pai tetsür aika agitsü mela-a ali nung tanü tashi Arab limatem nungbo benjongbentsü ajak nung chuba nungi shir tongtipur tashi atsüa arua pudaktsütsü asoshi tepoklang ajak menoknok amoker amato arakzua Muslimtsür tsüngsanger koba dang belly dance ta ajar. Aji oda yamaji tsüngsangtep yonga par sasep nungbo kecha tashishitsü maket ok shia tsüngsanga pelateper. Saka asen sobaliba aser aseni amangba yimsü denbo choreography, arakzura ajakbo magizükteter tetenzü mapet.

Tang Hug side nung yua aliba to bener arudi. Korea nungi bener aruba Mother's, Father's school aliba aitsür masü, ya kanga junger saka Hugging nung ya asung mangatetetep adoka tamangertem temolung yirura koda? Ajak küsa masüjii!!!

Temeim amangbapurtem, Arogoya Montoli oset ka lir, tetenzü lokdi temolung tentet. Nibo magizükteter, nibo tanga yimsüi meyipdi ta asudang, Arogo nung tenzüktetermi Tsüngremi dang O bendangtsü ta dang sür yutsütsüba mapa aser mapang ka masü ta nibo ashir, joko tai dang tai shidak dang shidak ta shitetsü mapang agi menepogo (metongshitsütsü). Kechiyong kar kenü, kar künü ta temolung yuruba agi tamang nung lula-a oor sentepi tarur mali kümra, Arogo senpong tazung kümra, tamangba nung tashi mait alura tanaben mesotsü tasak asütsü. Tetenzü tenla ki paika ya rongsen tulu endoka yangluba ki nung nisung tamener melira koda?

Kechiba tanü ni iba onük ya zülur ta süra taoba anogo August 17*18 Tir Yimyim Olem Sabang nung Mother's, Father's koba shidak, koba tai zülutsüogo. Tetenzü Arogo nung full time tenzüker temi tanela nung aser shi nung kanga saksalema alitsü mapang tongogo. Tanela tamang den medema administration inyakyim ajak nung asen tsüngsü nepurtemi repringdagi (tai apur ta masü) aji oda paper works ajak nung ano tali serious süa inyaksü ayongzüker.

Temeim Khristan nütsung tajungtem, tila ka akoktsüba mapa ya maongka onsara tulu ta asenoki angateta, talisa town tulu Arogo nung ya nüpo tajung, tagotet, sempet tajung aketer jendisa jendi lir. Karbo asung leper aitsüpur arogo zungsem tamanger tajung aika liaka, Sarasadem ka shilem aginüaka shilem agitsü makokba pur jendisa jendi samaogo, ano yamaji aika lir.

Arogo sendong koba nung südir süang inyakertemi sarasadema yangluba sendong nung kodang na akodir Tsüngrem tenünga asangtsü ano alima nung alir asünung, inyaker tenünga sanga pelasete sarasadema bilemdanger asenia tanüla nung shilem agitsüla aser tangar a tanüla nung temoatsü angutsüsa shilem agitsüla.

Ni ano sa ashir, Arogo nem ter shilem shidak ita shia agütsüba den tanga tamang tenla jendi den sentepia regular süa arur jendi lir saka shilem agitsü maongka makoor. Nütsung onsara asüba agi.

Tatamsa, Kodak lima alima nung yanger asü nung inyakdang süli, shilem agidang süli aibelentsü ajia tim dang, iba tangatetba tajung amangbapur ajak dak keta aliba yong Arogo taküm aliba asoshi pelar aser Tsüngrem tenüng asanger.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



Khrista nung asen adianutem timtem nung aliba angateta telungjem temaitsü AEC Church, Esa-Nagri, Jaranwala nung Cabinet Meeting ka amen. Ghonda 72 tsungta tekülem ki ana yanglushiogo. Danga tekülem ki raksatsür aliba yanglushitsü atema Punjab sorkari bendanga agütsür inyaker. Ki rongdoktsür aliba kilen shia Pakistan nunger sen lakh 20 agütsütsü, ta Mohsin Naqvi-i ashi.

Indonesia nung tekülem sentong anendaktsüba mechi ita 3 tepuokdak ayutsü

Surabaya, Luroi/August 22

(Agencies): Indonesia nung Khristanpur tekülem sentong agia aliba anendaktsüba mechi taoba hopta Muslim nunger kai ta asem tepuokdak ayutsü obendang agütsü.

Osangtem ajanga ashiba agi, iba ken o ya tamangba yimsü mezügmeshiba nungi tekülem sentong nung meinprogba kumja aser Muslim nungbai arogo den tenangzüktep ka yangluba mechi temerenshi ajemtsü.

Sumatra asetkong nung aliba Tanjungkarang District Court ajanga arishi küm 41 tain Wawan Kurniawan nem iba obendang ya August 15 nü agütsü, shiba Bandar Lampung City, Lampung Province nung aliba Rajabasa District kübok Rajabasa Jaya yimdak RT 012 kiyong nung tekolakba lir. Pai Tabernacle of David Christian Church (Gereja Kristen Kemah Daud, mesüra GKKD) indang tekülem sentep meinprongba mechi iba temerenshi ya agütsü.

Bandar Lampung nung aliba Tanjung Karang District Court nung obendanger tekolakba, Samsumar Hidayat-i temerenshi sangdongba ya prosecutor temi meshiba dang ita ka agi tajemba lir.

Aibelena alisang aser arogo tsungta tangatetep kati aruba ajanga temerenshi tajemba kumtsü, ta Hidayat-i ashi.

Obendanger temi ashiba agi, Kurniawan-i Indonesian Criminal Code indang Article 335 nung aibelen, kechiaser tekülem sentong anendaktsüba ya pa kiyong ka nung tekolakba tashi dak alia lir.

Temerenshi ya kanga tepongpa lir, ta religious rights advocate Satya Nugraha Yanutama-i ashi.

Police temi Kurniawan ya Indonesia indang blasphemy law kübok March 22 nü apu. Saka Information and Legal Section of the Lampung High Prosecutor's Office, tekolakba Made Agus Putra-i May ita ashiba agi, Bandar Lampung

Prosecutor's Office nung aliba Public Prosecution Team ajanga Wawan ya May 11 nü chiok.

Iba temerenshi ya ajanga Indonesia indang justice system nung meshidak aliba sayur, koba ajanga kin tilatem nem timtem agütsür, ta Satya-i ashi.

"Ken o nung aliba nisungtem dak ajemdaker ozüing ya amshir. Tatishitsü agi Indonesian Ministry of Religious Affairs ajanga nüburtem sunepa aser angatettepa alitsü mechi mosque nung sound-system volume atema totuyuba agüja lir, saka shingaia mangar. Anungji temerenshi maliji tebilemstü maneni alitsü," ta pai ashi.

Mosque aika Khristanpur tekülem ki anasa yanglua lir, aser parnoki sound system tulu amshiba ajanga tekülem sentong nung timtem ajurur, ta Satya-i ashi.

Pastor Lukas Sutrisno-ia tatishitsü ka bener arua ashidang, 2016 küm Muslim nunger sarasademtsü asoshi ola tulu adoka ayongshiba Buddhist tsür kati ashishiba yong rongrong adoka lang tepuokdak ita 18 ayu, ta ashi.

"Ozüing ya kin tilatem dak dang alar," ta Pastor Sutrisno-i ashi.

La indang ken o nung amshiba ozüing ya Indonesia Penal Code indang Chapter 156a lir, kong "Indonesia nung nisung shibai asaa yimjak nung tamangba yimsü ka anema tim masüba mapa inyakdir, tepuokdak küm pongu tashi ayutsü," ta shia lir.

Buddhist tsür tangbo arishi küm 49 junger alila Meiliana ya China nungi jakzükbba aser iba mapang la Tanjung Balai, North Sumatra nung telidak liasü. Jalan Karya Neighborhood I, Tanjung Balai Kota I Urban village, Tanjung Balai Selatan District nung aliba Al Maksun Mosque nung sarasademtsü asoshi ola tulu agi sangdongba atema lai July 22, 2016 nung lar ki anasa dokan kibur ka dang ashishia liasü.

Iba sülen mosque nung

tesayur aser lar staff kar Meliana'er kidangi aru aser iba mapang parnok kanga sashia asatep, saka Meliana kinungboi tatok meshiba sülen tensa junga akum.

Minute ishika lir mosque ketdangsür temi Meliana ya yimtsüing nung tekolakba dangi anir ao aser iba sülen angatetteptsü meranga police dangi anir ao. Parnok tsungta angatetteptsü meranga jembishinüba mapang yimtsüing tezülen nungi nisung kari longkak aita ki o jen raksatsü tenzüng.

Meliana'er ki aser Tanjung Balai nung aliba Buddhist temples aser monasteries tem raksatsü. Anü madokdang Asahan ayongbang nung aliba Tri Ratna Temple aser Dewi Samudera temple tem raksatsür liasü. Iba mapang monasteries asem, temple ti, Chinese foundation offices ana aser medical center ka raksatsür liasü. Police temi nisung 20 apu.

Meiliana-i tamangba yimsü mezügmeshiogo ta March 2017 nung ken o benok aser monastery aser pagoda raksatsüba nung shilem agia alir nisung ti pua ita ka nungi asem tashi tepuokdak ayu.

Muslim nunger sarasademtsü asoshi ola tulu amshia ayongzükbba atema ashishiba asoshi Meliana ya ita 18 tepuokdak ayutsü obendang agütsü. Indonesia nung aliba aser bendanglen aliba advocate temi longkak aitba sülen la ita toku tepuokdak yur May 21, 2019 nü parole nung chiok.

Muslim nunger lokti tentet tulu ana, Nahdlatul Ulama aser Muhammadiyah den tejangja lenir kari la nem temerenshi agütsüba aitsü. Aser Meiliana chiokang ta Tir Joko "Jokowi" Widodo dang asüngdangba petition ka nung meyongnem agütsür 30,000 liasü.

Khristanpur yariba lokti tentet, Open Doors ajanga alima nung Khristanpur alitsü linük 50 asadangba 2023 World Watch List nung Indonesia ya jenjang 33 buba nung lir.

ANOGO ABEN TSÜNGREM DEN

I bai tongmelang süang

O nisung, kechi tajung Pai ne dang sayuogo; aser ochishia inyaktsü, aser yimlibilem meimtsü, aser ne Tsüngrem den ajemalua jajatsüba dak alema ano Kibubai na nungi kechi akanger. Mika 6: 8.

Albert Einstein-i ken yamai ashi, "Nai tongmelang agi meshitetra nai kodanga kecha nung master mesütet!" Physics, saisabong, mesüra Khristan tamang tesayuba nung iba o agütsüba nung ochi o aika dena lir.

Anungji Khristan taküm ka koda alitsü tongmelang agi ashitsü merangang. Ibai tasak asütsü akok. Asenoki ibai maparen aika ajanga rasaa ashitsü meranger-sarasadem, tanelaren kakat azüngba, kuli asüba, tekülem, tangar tenzükbba, aser ibala mesükba. Kodang lokti mapa arogo mapa den meyoktepedir - mesüra arogoi yangluba ozüing agi tai nangzüksüdir, mesüra ozüing agi deobar mongdaktsüdir. Saka Khristan taküm kaji khuret küma alitsübaji Tsungrem tebilemba masü. Mika 6: 8 nung tongmelang aser jangratemtsü o shia lir - kechi tajung aji inyakang, taochi meimang, aser Tsüngrem den ajemalua jajaang.

Kong nungi tenzüksü nai mejangjara, kangki nungi tenzükung. Asenok tekümtet asoshi Khrista timatempa dang nungi tajungba lenmang mali. Yisu taküm aser tesayuba nung ochi, taochi, aser ajemaluba angur. Pai jungtephidaktsüba mapa nung amangba ajanga asenoki Pa tsüngsü nung aotsü akoker.

Pakistan nung Khristantem ki aser tekülem ki raksatsür alir nem teyari agütsür

Islamabad, Luroi/August 22

(Agencies): Quran raksatsüogo ta tai tonglokja Pakistan nung Muslim nunger temi tejashi agi taoba hopta nisung aliba ki aser tekülem ki raksatsür aliba Khristanpur nem ketdangsür temi senotsü agütsür.

Bodhbarnü Muslim nunger noklang aika Punjab province kübok Jaranwala nung adenshia ki o jen raksaja ao. Khristanpur ka aser par medemer temi Quran nungi tapak kar shizüka danga tapak tem nung mezügmeshi o zülutsü ta tai tongloktsüba sülen iba lendong ya atalok. Pakistan nung tamangba yimsü mezügmeshiba asoshi tasüba agi merenshiteter.

Mapang tatsüka lir Khristanpur 100 jungnüa Jaranwala nung kidangi meyipa shilang dang parnok indang ki okshia raksatsür liasü.

Anwaar-ul-Haq Kakar, shiba tang Pakistan nung khen asoshi ato kilonser inyaker, pai ki raksar aliba kilen shia sen \$6,800 (India nunger sen lakh pongu dak tali) agütsütsü, ta Hombarnü ashi.

Television ajanga jembidang Kakar-i mapa tamajung inyaker ajak merenshitsü nangzüker aser parnok ya meimchir asoshi tsükchir lir, ta ashi.

Tang tashinung police temi iba mapa tamajung inyaker nisung 160 pua lir, koba Pakistan

puti otsü nung teraksa tulutiba alitsü.

Punjab province nung ketdangsür Mohsin Naqvi-ia timtem ajurua aliba Khristanpur nem senotsü agütsüba osang ya X (taoba mapang Twitter ta ajaba social media) nung sangdonga liasü.

Naqvi-i deobarnü Jaranwala semdang aser yangji aliba lenirtem den mi agi ronger aliba tekülem ki ka nung senden mena liasü.

"Parnok (Khristanpur) tetsübo nung lir; parnok parnok chirnurtem asoshi shisabolur, shirnoki iba lendong nguogo aser aoksar lir," ta iba yimti nung putir Khalid Mukhtar-i ashi.

Yimti nung aliba tekülem ki 26 ya langka kar nung raksatsür mesüra mi agi rongtsür lir, ta pai ashi.

Naviq-i senotsü teyari agütsüba maparen ya ghonda 48 tsungta tembangtsü aser raksar aliba ki o jen yanglushi tenzükgogo ta ashir, saka Mukhtar-ibo yamaji masü ta ashir.

Tekülem ki ana indang jara yanglushitsü melena sentsü ang tepshiogo, ta Mukhtar-i ashi.

Pakistan nung nütsüing yongsük shilem 96 shi Muslim nungertem lir aser Open Doors USA ajanga aliba nung Khristanpur alitsü linük tamajungtiba 50 asadangba nung Pakistan ya jenjang 7 buba nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Rüken

(n) somomo dong nung atangba tejang (banana flower)

* Tanü asüngbo **rüken** jenjang kanga saaka kümogo.

Rüket

(v) süng agi tua yokba (to poke a stick in)

* Tanurtemi kimalen nungi jara ateta süng **rükettsü**.

OLONG PAITEP # 6614

	1		2			3		4		5
6								7		
						8		9		
			10							
11										
				12						
13		14		15						16
17								18		

TIPILEN

- 1. Inyaker ajangtelba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ___ hi - (3)
- 16. Akümüli nungi pilar - (3)

OLONG PAITEP # 6613 TELANGZÜBA

TIPILEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.



TANTSÜR TAMBUR KIBONG OTSÜ :

Tantsür tambur couple ka, chirnur den talangka majurutep nung jabaso dang tebui phone nung rasaa jembir.

Tebu : Talakba na, nütsü küna joko kati ka mereprangner, küm tenem tashi külemi kilempok ka nung lia arur khen danga kati ka dak merangloknüi, ola angsüngla mangashitepner, küna balatsü telemtetba agiogo no, nüyi danga nai dang shiang. Nena tepilembaa mangatsüa.
(Pang ta sür phone ayur)

Jabaso : Oya, ojala o obala nato balatsüa asüra, koda süla?

Jala : Arree, kechi tesüngmangtsü osang aji? Ataang, oyalai khen jembidi.

Oja oba ya kechia ta asürba, nena khenyongi mepalatsü, talakba künaprong kibong ajunga leave agir asüngsa flight nung arutsü.

Tebu : Tantsü, angur südi? Parnok pei pei atema dang pilema anata amadoker alirji tanbo arudarji.

Tantsü : Haunii, nai junga sayangsüogo.

(Moral: Pei tsürabur tain akümdang tesendok)

- Lilir : WhatsApp

Taoba Arunachal CM Apang-i political party tasen ka tentet



Taoba Arunachal CM Apang-i osangbenertem den jempiba noksa nung angur.

Itanagar, August 22, 2023

(Agencies): 2024 Assembly elections nung ADP-i Assembly constituency 60 prong nungi tokteptsü tebilemba lir.

"Tanü state nung law & order tensa aser education sector jenjang mejungi aliba ajanga iba party tenteter" ta ADP founding president Apang-i ashi.

"ADP tentetba ya state ajungkettsü atema lir. Arunachal nungi ochimashi agientsü, lanurtem nem mapa agütsütsü aser law & order tensa azüoktsü" ta pai ashi.

2024 assembly elections nung sorkar akümtsü tashi ngura Arunachal Pradesh ya 6th Schedule kübok tendaktsütsü aser iba ya state nung alirtemi mapang talangka nungi aginüa aruba lir, ta Apang-isa ashi.

Arunachal Pradesh nung ali rongsen aika lir anungji Centre nungi teyari menguaka maparen inyaka otettsü, ta paisa shisem.

"ADP ya regional party tashitait ka asütsü aser Arunachal Pradesh tasen ka akümtsü alizüng lir. Nübortem aser talisa lanurtemi iba party nung adentsü mepishir" ta

Gegong Apang-isa metetdaksü. "Arunachal Pradesh nung law & order maparen tim mesüi benshir aser iba ajanga tensa mejungi kümogo. State sorkari education facilities nungdakba magütsür aser iba ajanga loktiliba nung lanurtem temdangsüngdangertem ama kümogo" ta pai ashi.

"Iba jagi regional political party tasen ka tentettsü nungdak ta ajitet. State renloksü atema asenoki Centre sorkar teyari menüngdaker" ta taoba Arunachal CM-isa metetdaksü.

Manipur nung lisopurtemi NH-37 aser NH-2 mokdanga lir

Imphal, August 22, 2023

(Agencies): Manipur yimtiba Imphal-i Assam nung Silchar den sendaktepa National Highway-37 mokdanga aliba tera lapokogo aser tang nungdakba abenba truck gari 171 süiogo ta police-i ashi.

Ajisüaka, Imphal-i Nagaland kübok Dimapur den sendaktepba National Highway-2 mokdanga lir.

Committee on Tribal Unity (CoTU)-i Hombar nungi Kangpokpi nung NH 2 aser Tamenglong district nung NH 37 mokdangtsü tenzuka liasü.

Manipur tenemlen aliba Kuki-Zo nungeri

nungdakbatem peria agüjang ta takhangba agüja parnoki lenmang mokdang.

"NH 37 nung gari 171 süiogo. Lendong ataloktsü tesem ajak nung security maparen inyakogo aser garitemi tiptema senzütsü atema security convoy agütsür" ta Manipur Police-i metetdaksü.

Yashi Imphal West nung ki tazüng pezü aser community hall ka rongdoktsüba ken o dak sendakba nung nisung 6 puogo ta police-isa ashi.

"August 20 aser 21 ayaterm nung Langol, Imphal West district nung mejangja nisung

kari ki tazüng pezü, jen ka aser community hall ka rongdoktsü. Iba dak sendakba nung nisung 6 pua lir" ta parnokisa ashi.

Imphal West, Imphal East, Thoubal, Kakching, Churachandpur, Tengnoupal Kangpokpi aser Bishnupur district tem nung security forces-i mita odar.

"Imphal East, Kangpokpi aser Tengnoupal district tem nung prangpong 7 aser ammunitions 81 ngutetogo" ta police-isa ashi.

Manipur kübok tesem balala nung checkpoints 129 amenoka lir aser police-i ozüng alema inyaker nisung 1,369 puogo.

Assam-Meghalaya arrtsü atema regional committee ajuruteptsü

Shillong, August 22, 2023

(Agencies): Assam aser Meghalaya regional committee temi August 26 nü ashishitep aliba Langpih semdangtsü ta Meghalaya Social Welfare Minister Paul Lyngdoh-i ashi.

August 26 nü committee anaprongi ground zero semdangtsü aser idakji alirtem den ajuruteptsü, ta Lyngdoh-i

ashi.

Guwahati nung taoba senden amendang state anaprong nungi regional committee temi Meghalaya nung West Khasi Hills district kübok aliba Langpih semdangtsü mulungtepa liasü.

Meghalaya aser Assam state temi Langpih tesem atema kuli agütsür. 2010 küm

iba ashishitep aketba tesem nung nisung 4 khaset.

Yaküm March ita Delhi nung state ana tsüngda MoU ka nung sign sütepdang ashishitep aliba tesem 6 asoshi angatetteptsü mulungtep.

Tesem trok nung West Khasi Hills district kübok Langpih aser West Jaintia Hills kübok Mukroh dena lir.

Centre-i ILP atema süoki ia mebilemer: Meghalaya Congress

Shillong, August 22, 2023

(Agencies): Centre sorkari Meghalaya nung Inner Line Permit (ILP) mapa tenzüktsü süoki ia mebilemer ta Congress legislative party leader Ronnie V Lyngdoh-i ashi.

Iba takhangba ya kanga nungdak aser sorkari jungjunga


asadangba sülen lemtet ka agitsüla. Meghalaya aser nübortem ajangzüktsüba onük ajak Congress-i pusema nungiter, ta Ronnie V Lyngdoh-i ashi.

Meghalaya nung railway projects magizüker. Iba mapatong ajanga ozüng alema

nisung aika state telungi aittsü ta bilemer anungji sorkari mapatong metenzükdang iba tebilemetsü atema mapa inyaktsüla, ta paisa ashi.

Meghalaya railway project ajanga state nung timtem bentsür marutsüsa state sorkari inyaktsüla ta Lyngdoh-isa ashi.

Pakistan tebur Hockey team coaching staff ajunga mapa nungi anentsü



Shahnaz Sheikh

Luroi/August 22, 2023 (Agencies): India nung tawa tembangba Asian Champions Trophy nung semi-final tonga masayatetba sülen linük sports board kübok committee kati Pakistan tebur hockey team indang coaching staff ajak mapa nungi anentsüogo.

Head coach mapa abentsü atema Shahnaz Sheikh shimogo saka iba ajanga mepetmesü adokogo, kechiyong pa ya Rehan Butt, Muhammad Saqlain, Haseem Khan aser Muhammad Ghafoor nung mapa nungi aginba Pakistan Sports Board-i achaayangba committee nung züngsem ka lir.

Shahnaz ya taoba mapanga head coach liasü. Pa consultant asütsü shim aser ACT atema Chennai-i aotsü

liasü ajisüaka Pakistan Hockey Federation (PHF) pa atema mapang shitak nung visa magizüktet.

PHF telung nung inyaksangshir kari ashiba agi, Shahnaz mepelai liasü aser pa team den külemi aotsü atema visa agizüksü asoshi PHF-i jenjang shitak magi ta bilemer. Team trok asayaba iba asayamung nung Pakistan tem pongububa nung tembanga liasü.

Ibayongji team kidangi meyipa aruba sülen mapang tatsüka dang lir committee-i iba telemtetba agia liasü, kong Shahnaz aser taoba mapang Olympian Akhtar Rasool aser Islahuddin Siddiqui na densema lir.

Shahnaz kübok

inyaksangshitsü aliba coach tasentem rongnung Shakeel Abbasi, Amjad Ali aser Dilawar Hussain nung densema lir.

Kasa mapang nung Olympian Kaleemullah lenisüba nung PHF national selection committee-i Asian Games atema asayar 36 shimogo. Item asayatem ya Mongolbarnü nungi tenzüka Naseer Bunda Hockey Stadium, Islamabad nung training camp ka nung shilem agitsü.

Asayatem yamai alitsü:

Goalkeepers: Akmal Hussain, Abdullah Ishtiyag Khan, Waqar, Ali Raza, Abdullah Sheikh. Defenders: Mohammad Abdullah, Arbaz Ahmad, Mohammad Sufyan Khan, Aqeel Ahmed, Mohammad Bilal Aslam. Midfielders: Usama Bashir, Mohammad Murtaza Yaqoob, Arbaz Ayaz, Ahtisham Aslam, Mohammad Baqar, Mohammad Nadeem Khan, Mohammad Imran, Syed Shehbaz Haider

Forwards: Mohammad Imad, Afraz, Roman, Arshad Liaquat, Abdul Qayyum, Abdul Rehman, Waqar Ali, Mohammad Arsalan, Mohammad Umar Bhat, Abdul Hannan Shahid, Mohammad Shahzaib Khan, Abdul Wahab, Zikriya Hayat, Bisharat Ali, Rana Waleed, Hamza Fayaz, Abdul Rehman.

Asia Cup 2023 atema India squad sangdongogo



New Delhi, Luroi/August 22 (Agencies): BCCI-i Asia Cup atema ODI squad nung asayar 17 tenüng sangdongogo, kong KL Rahul aser Shreyas Iyer nata densema lir. Kasa mapang nung Jasprit Bumrah-a Ireland nung tang asaya aliba T20I asayamung nung pa temang tajungba akümba kuli agütsüba sülen ODI asaya nung tanaben asayatsü asoshi meyipa aruogo.

Delhi nung chief selector Ajit Agarkar lenisüba nung selection committee senden ka amenba sülen iba asayamung atema India team nung asayatem tenüng sangdonga liasü.

Senden tembangba sülen Agarkar aser India captain

Rohit Sharma nati team sangdong aser iba sülen osangbenertem den sensaksama liasü.

Tilak Varma aser Prasad Krishna nata team nung züngoksemogo aser Sanju Samson back-up player ama shimogo.

KL Rahul Asia Cup atema asayar 17 agi kümtetba India team nung züngoksema lir, ajisüaka pa temang kanga junga taneptsü monguteti lir anungji pa asayatsü masayatsü tang tashi mejangjai lir.

Maneni Iyer-a yirur mapang talang ka masayateti arur tang team nung züngokemogo. Iyer bo taneptsü kanga junga

ngutetogo, ajisüaka Rahul tanga timtem ka agi maneni kangshidar.

Asia Cup ya August 30 nü Pakistan aser Nepal na Multan nung asaya tenzüksü.

India team asaya ajak Sri Lanka nung asayatsü aser parnok September 2 nü Kandy nung Pakistan den asayatsü.


India, Pakistan aser Nepal Group A nung lir aser Sri Lanka, Bangladesh aser Afghanistan Group B nung lir. Telok anaprongla nungi temaba jenjang nung tembangba team anana 'Super 4' stage-i aitsü.

Iba asayamung nung ajak senteper asaya 13 alitsü. Asaya pezü Pakistan nung asayatsü aser asaya teku Sri Lanka nung asayatsü.

Final asaya September 17 nü Colombo nung asayatsü.

Asia Cup atema India team: Rohit Sharma (c), Shubman Gill, Virat Kohli, Shreyas Iyer, KL Rahul, Hardik Pandya, Ravindra Jadeja, Jasprit Bumrah, Kuldeep Yadav, Mohammed Siraj, Mohammed Shami, Ishan Kishan, Shardul Thakur, Axar Patel, Suryakumar Yadav, Tilak Varma, Prasad Krishna.

France Under-21 coach asütsü Thierry Henry shimogo



Thierry Henry

Luroi/August 22, 2023 (Agencies): Taoba mapang France nung nungtuugu football asayar Thierry Henry, national under-21 team coach asütsü atema shimba Hombarnü sangdongogo.

French Football Federation-i ashiba agi, Henry den küm ana atema tenanzüktepba yangluogo aser pa lenisüba nung France Under-23 team 2024 Paris Olympics nung asayatsü. Federation-isa, iba asayamung nung shilem agitsüba ya tongtibang nükjidong ka ta shiogo.

Coach mapa agizükba sülen Henry lenisüba nung France team mezüngbuba September 7


nü Denmark den friendly ka asayatsü aser iba sülen anogo pezü lir Slovenia den 2025 European Championship atema qualifying asayatsü.

Arishi küm 46 tain Henry shiba Belgium assistant coach ama anaben tashi inyakogo. Pa taoba küm World Cup nunga Belgium assistant coach liasü, ajisüaka February ita Roberto Martínez melena Domenico Tedesco head coach asütsü shimba sülen pai mapa tokja liasü.

Belgium team nung anabenren inyakba tsüngda pa Monaco aser Major League Soccer team Montreal head coach liasü.

Henry ya 1998 küm France-i World Cup akokba team nung züngoksema liasü. Pa career nung mapang talangba ka Arsenal nungi asaya liasü aser pa iba team nung goal timtiba indaktsüba asayar lir. Maneni pa Monaco, Juventus, Barcelona aser New York Red Bulls nungia asayaogo aser 2014 küm asaya nungi anena liasü.

Kerala Blasters-i Ghan nung striker Kwame Peprah alizükogo



Kwame Peprah

Luroi/August 22, 2023 (Agencies): Indian Super League (ISL) club Kerala Blasters-i Kwame Peprah alizükogo, ta club sangdong ka ajanga metetdaksü. Ghana nung striker ya Blasters nung küm ana atema denogo aser iba tetezü pa club nungi 2024-25 season tatem tashi asayatsü.

"Kü nem iba maangka agütsüba atema club dang kanga pelar. Ni iba club nung densema atema aser India nung asayatsü maangka angba atema kanga pelar. Ni yakta teammate tem den longjemer taruba season tenzüksü asoshi yongya atar," ta Kwame Peprah-i ashi.

Peprah shiba Kumasi, Ghana nungi lir, pa Ghana, South Africa aser Israel nung first division nung asayaba asayar ka lir.

Arishi küm 22 tain striker ya

Ghana Premier League nung local club King Faisal FC nungi asayaba mapang jangja aküm. 2019 küm mezüngbuba asayaba mapang pai asaya 13 nung goal ana idakja liasü. Iba sülen pai 2020/21 season nung goal 12 idakja club nungi goal timtiba idaktsüba asayar aser league nung goal timtiba idaktsüba asayatem rongnung tanabuba jenjang nung liasü.

Iba sülen Peprah ya 2021 küm Orlando Pirates-i ao. Pa nem Pirates' Player of the Season naroküm agütsü aser DStv Premiership Young Player of the Season award atema züngoksema liasü. Iba club nungi mezüngbuba asayaba küm pai goal 7 idaktsü.

Blasters nung maden tsüngda pa DStv Premiership nung Maritzburg Utd. aser Ligat ha'Al nung Hapoel Hadera team nungi asayaogo.

"Kwame ya onok team nung asayar tongtibang ka asütsü. Pa asojen aser football skill ya team asoshi kanga tongtibang asütsü. Kwame ya kanga versatile aser takara lir aser pai Hero ISL nung defender tem timtem agütsütsü aser team temaba jenjang tongtettsü atema teyari agütsütsü," ta Kerala Blasters Sporting Director Karolis Skinkys-i ashi.

BILEMDANGANG

"Temeim sayudi süra mokorai sayuang. "